

# EPESO

---

## Wimaamala

**1** <sup>1</sup>Taumi o iwoiyawena memi Epeso u hinena Yesu Keliso tu wotagona omi leta geke tau Paulo uyahiugei. Ma Yaubada a nugotuhugei ipa tau Yesu Keliso a tu wituwetuwega.

<sup>2</sup>Yaubada Amata ma ata Guyau Yesu Keliso hai lunugotootogo ma hai nugodumola hina melabenimi.

## Hagu Keliso uyahinei

<sup>3</sup>Yaubada ta mamali, tauna ata Guyau Yesu Keliso Amana po tauna Yada a ombenenagei hagu e weleweleta ita luyagohana wouna binei babana Keliso a bolu tauta. <sup>4</sup>Yohola hipuli ega ita wiwawali ma i winagana tahaeta po ipa Yaubada u matana ta wiwoiyawa po ta dumalu. <sup>5</sup>Odubona Yaubada a winugonugotuhu luhogalagei i wiwogataleya ipa Yesu Keliso uyahinei anai kaohana ina kawainatuneta. <sup>6</sup>Uyahinei ta wotalagiyeya, tauna a lunugotootogo didigana i'mbeneneya ubeita babana a Natututuwoga mitehi i wiemoteta <sup>7</sup>po Natunana talana uyahinei apapoehi panipanita i lupena hahehi po ata dewa apapoe i paligigilihi naka tauna a lounugotootogo banei dumana i palihaleya tauta ubeita, <sup>8</sup>a hanapu po a nugogadagadala atapuhi uyahihiyei. <sup>9</sup>Ma tauna anai kaohana a nugotuhu laugowagowadana i wogeleteya uyahita, babana a wiwogatala odubona ipa naka Keliso uyahinei hagu ina weleta. <sup>10</sup>A wiwogatala geegeka houga anani kokoe uyahina ginouli i wawalihi hoi yada po hoi hipuli apo ina lugogonihi po Keliso ina taniwagehi.

<sup>11</sup>Yaubada tauna a nugotuhugei i tanitaniwaga ma ginouli atapuhi hi waawala yaka i nugonugotuhu tahaeya ubeita po i winaganita Keliso a bolu binei, <sup>12</sup>ipa tauyai mi Yudeya tu nugotuhu lagona tahatahayai Keliso uyahina a wasawasa to wotalagiyeya. <sup>13</sup>Taumi gasi Keliso a bolu babana a baha dumana naka tuwega dewadewana o nonoli po o witumaganeya omi luyagohana binei po Alugo Woiyawa lolowa i bahabaha pikogeya i welemi. Naka Alugona ita wekiwekilala <sup>14</sup>po ipa uyahinei ma ta

hanapugeya Yaubada a paliwitumagana a bolu uyahita yohola apo palihalena ta tuhagaya po tauna uyahinei a wasawasa ta wootalagiyeya.

### Paulo a lupali

<sup>15-16</sup>Houga atapuna taumi bimiyei a imaamala Yaubada uyahina po a laupali bimiyei, matababana tuwegami a nonoli ipa Guyau Yesu o witumaganeya ma a bolu waiwoiyawahi nugonugomiyei o lauhogalehi. <sup>17</sup>Ma u lupali babahi geegeka, ipa ata Guyau Yesu Keliso Amana tauna Yaubada tu wasawasa baneina hanapu ina welemi po ina woogeletena meya uyahimi po ona hanapugena dumaya. <sup>18</sup>Ma a laupali gasi ipa nugonugomi matahi hina gunagadagadalihi ipa ona hanapugeya ginouli dewadewahi ubeihi i otugemi po ona iononana omi winugotuhu laganagei a ombenena diidigana lawa waiwoiyawata tauna a wasawasagei. <sup>19</sup>Ma a laupali a kadidili banei dumana ega tata hiyahiyawa tuhagaya tu witumagana uyahita ona hanapugeya. <sup>20</sup>A kadidilina i wogeleteya houkana Keliso hilage uyahinei i witowolo meya po hoi yada awala hinebawana uyahina i houna geleteya. <sup>21</sup>Uyahinei Keliso lawa gowagowadahi atapuhi hai taniwaga i gelagoni: tu tanitaniwaga po tu kadidili po tu manini po tu wiguyau gowagowadahi atapuhi i gelagonihi; po tauhi gasi gowahi baneihi hai witaniwaga geke houkana po houga he nenei uyahihi i gelagonihi. <sup>22</sup>Babana Yaubada Keliso anani taniwaga i weleya ginouli atapuhi ubeihi ipa ina tanitaniwagehi ma tu witumagana boluta uyahita gasi e tanitaniwaga. <sup>23</sup>Matababana Keliso tauna ununuta po tauta hinina gutagutana. Uyahinei e laihogota mei a wiwawala atapuhi e laihoga pahihi.

### Hilage uyahinei apo luyagohana ta tuhagaya

**2** <sup>1</sup>Taumi odubona mei hilahilagemi omi wiponahahalena po omi apapoe uyahihiyei. <sup>2</sup>Ma odubona hipuli a dewa apapoehi o dewedewehi, babana alugo apapoehi tauhi hai bada a kadidili u hinena o memae po o iponawogogeya yaka naka alugona tauna tu paliguyaguyau he wootagoya ma u nugonugohi e memae. <sup>3</sup>Odubona tauta mei tauhi naka pitena hinita po ita winugonugotuhu apapoehi ta wootagohi uyahinei Yaubada i lauyogigiyeta, babana ata dewa atapuhi mei tu mehipuli hai dewa. <sup>4-5</sup>Uyahinei ata apapoe i wihilagenita ma tamogi Yaubada a lunugotootogo po a luhogala banei dumana uyahita yaka i witowolo meta po Keliso mitehi tauna a luhogalana uyahinei i luyawahita. <sup>6</sup>Ma Keliso mitehi i wohepata po yada a manini i weleta po Yesu Keliso a witaniwagei ta tanitaniwaga. <sup>7</sup>Yaka houga he nenei uyahihi a lunugotootogo apo ina wogeleteya uyahita ma a luhogala banei dumana Yesu Keliso uyahinei ina wiatatiyeta. <sup>8</sup>Babana a lunugotootogo tepanei amaka i halota ata witumagana binei, ma ega tauta ata bagibagi

uyahihiyei ma Yaubada tauna a ombenena uyahinei. <sup>9</sup>Ega emoemotana po tauta ata bagibagi uyahinei luyagohana ta tuhagaya, meka po apo ta nugogegae po tana pa, 'Tauta ata kadidiligei'. <sup>10</sup>Ma tauta Yaubada a wiwawala wouna Yesu Keliso uyahinei ipa bagibagi dewadewahi ta dewahi naka Yaubada odubona i inaganihi ubeita.

### Keliso gowanei ta wibolu emota

<sup>11</sup>Taumi tu meuputa lawami ma ega mi Yudeya, uyahinei mi Yudeya hai wekiwekilala hini omhapina lawa nimahiyei ega ota wiwaya ma he idibogimi. <sup>12</sup>Odubona taumi ega Keliso a bolu yaka taumi o mebala dao po Isalaela anani taniwaga o mepuputteni ma Yaubada a wogatala i palipaliwitumaganehi ega kikina ota galena tuhagaya. Uyahinei ega ota inugotuhu lagoneya babana Yaubada ega ota hanapugeya po ega ota inugonugotuhugeya. <sup>13</sup>Lolowa o mebala dao ma geke hougana Yesu Keliso i hilage po talana i kololo bimiyei yaka i weluwini po o nei u liyaliana.

<sup>14</sup>Lolowa tauta ta imemepuputana po tauyai mi Yudeya ma taumi tu meuputa ma geke hougana Keliso ita wikahakaha i hoe halehi ma i houna imahiyeta dumola u hinena po tauta guguni emosi. <sup>15</sup>Tauna hinina a wiyuwa uyahinei Mose a lugagayo hi laugudugudumi i hoe halehi ma tauna i wiemoteta po ta wibolu emosi tauna miteta, po tauna uyahinei ta nugoemota. <sup>16</sup>Ma hini emosi hota a hilage hoi ani take uyahinei ita winugokahakaha i hoe halehi po i weluwini meta Yaubada uyahina po i wiemoteta. <sup>17</sup>Uyahinei Keliso i nei po dumola i wiatatiyeta taumi uheiya o memae bimiyei ma tauyai u liyaliana to memae ubeiyai. <sup>18</sup>Babana Alugo Woiyawa uyahinei taumi po tauyai Keliso i weluwinita Amana uyahina.

<sup>19</sup>Taumi lolowa tu witoutoumana po tu wihewahewa ma geke hougana amaka o wiodubo Yaubada natunatuna mitehi po taumi Yaubada a guguni. <sup>20</sup>Yesu Keliso tauna Yaubada a numa iyawena ma tu wituwetuwega po tu bahapiko tauhi nimanima towotowolo ma tauta a modale po uyahitoyei a numa ina wogoya. <sup>21</sup>Yaka Yesu Keliso uyahinei ta wimodale balubaluta ipa tauta Guyau Yaubada a numa waiwoiyawata <sup>22</sup>po Alugo Woiyawa anani mae. Yaka taumi ega mi Yudeya ma tamogi amaka o winuma modelena.

### Paulo a bagibagi tu meuputa ubeihi

**3** <sup>1</sup>Geka binei ma tau Paulo houga magomagouna a laupali Yaubada uyahina. Tauna u bagibagi i weleweleu taumi tu meuputa bimiyei, naka binei ma hi houna luyeu hoi numa panipani po a memae.

<sup>2</sup>Nugote lolowa u bagibagi geke noyana o nonoli po bagibagina Yaubada i weleweleu a lunugotoogoei ipa taumi tu meuputa hagu

uyahiugei ona tuhagaya. <sup>3</sup>Ma u bagibagi geka tu meuputa uyahimi ega iyai gehouna ita galena tuhagaya ma geka hanapu gowagowadana Yaubada i wogeleteya uyahiu po omi leta uyahina a gilumiyahi. <sup>4</sup>Inapa ona hiyawa imahiyeya yaka apo ona hanapugeya po ona pa hanapu gowagowadana babana Keliso naka amaka a hanapugeya. <sup>5</sup>Ma hanapuna hapa tahatahayahi ega hita hanapugeya yaka geka hougana Alugo Woiyawa Yaubada a tu wituwetuwega waiwoiyawahi po a tu bahapiko uyahihi i wogeleteya. <sup>6</sup>Hanapu gowagowadana uyahinei taumi tu meuputa apo ani kaoha ona tuhagaya po mei tauyai mi Yudeya, ma ta wibolu emosi po paliwitumagana odubona hi bahabaha pikogeya Yesu Keliso uyahinei ta tuhagaya.

<sup>7</sup>Yaubada a kadidiligei po a lunugotootogogei tau a tu bagibagi ipa tuwega dewadewana Keliso binei a palipaligeleteya. <sup>8</sup>Ma tau mei tewela meyameyana tu witumagana u hayami, ma tamogi Yaubada anai lunugotootogona bagibagi baneina i weleu po taumi tu meuputa uyahimi Keliso tuwegana a wiatatiyaneya po a wasawasa diidigana ega emoemotata po ta hiyawa pahi ona galena tuhagaya. <sup>9</sup>Ma u bagibagi ipa lawa atapuhi hina hanapugeya Yaubada tauna ginouli atapuhi hai tu wiwawala ma houga daodaona a hanapu gowagowadana amaka i wogeleteya. <sup>10</sup>Ma Yaubada a wiwogatala ipa tauta a bolu uyahitiyei a hanapu tapuna po tapuna ina wogeletehi tu witaniwaga po tu kadidili gowagowadahi uyahihi. <sup>11</sup>Naka a nugotuhu odubona e woogeleteya ata Guyau Yesu Keliso uyahinei. <sup>12</sup>Kelisona amaka ta witumaganeya yaka ta nugomotu po emoemotana ta lui gae Yaubada u matana po ta laupali uyahina. <sup>13</sup>U wiyuwa binei ega ona tapitapiya ma tamogi ona hanapugeya omi wiwasawasa binei hi panuu.

### **Keliso a luhogala i lata duma**

<sup>14</sup>Uyahinei tau Amata u matana a polopolou, <sup>15</sup>tauna manago atapuhi hoi yada po hoi hipuli hai baba. <sup>16</sup>Ma a laupali ipa tauna a wasawasa diidigana po a kadidili ina palihalehi uyahimi po Alugona Woiyawa nugonugomi ina wikadidilihi, <sup>17</sup>po omi witumaganagei Keliso u nugonugomi ina memae. Ma a laupali ipa omi dewa po omi mae a baba dumana luhogala, <sup>18</sup>po tu wiwoiyawena ataputa mitehi Keliso a luhogala ona hanapugena imahiyeya, naka a yawata, po a dao, po a gae, po a hopu. <sup>19</sup>Gasi Keliso a luhogala ega emoemotata ta hiyawa pahi po ona hanapugeya ma Yaubada Tu kadidili ina lihogo dumami.

<sup>20</sup>Yaubada a kadidili u hineta e memae, ma inapa awai ta nugonugotuhuhu ubeihi ta laupali emoemotana apo ina luwitani po ina wibagibagi lagonena dumahi. <sup>21</sup>Uyahinei a bolu ataputa Yesu Keliso gowanei tana'mhuna hapa po hapa he nenei uyahihi ega sigasigana. Moina.

### Bolu emosi

**4** <sup>1</sup>Tau, Guyau a tu bagibagi panipanina u luhogala ipa omi dewa hina dewadewa, po mei tauna i ototugemi a dewa. <sup>2</sup>Ona nugohopuhopu ma ona launugodewadewa, ma on'omtaibagibagi ma emosi po emosi ona lauhogalena memi po ona launugohegohegoya omi lawa uyahihi. <sup>3</sup>Ma ona wileta kadidili po Alugo Woiyawa ina wiemotemi ma a nugodumolagei ina boinimi. <sup>4</sup>Matababana tauta bolu emosi po ata tu hagu emosi Alugo Woiyawa ma Yaubada e ototugeta ipa ata winugonugotuhu lagona emosi hota houga e nenei binei. <sup>5</sup>Ata Guyau emosi hota, po ata witumagana emosi hota, po ata bapatiso emosi hota. <sup>6</sup>Naka pite Yaubada Amata emosi hota, ginouli atapuhi po tauta i gelagonita ma tamogi u hineta e memae.

<sup>7</sup>Ma Keliso a wiwasawasagei emosi po emosi ata guta i weleta. <sup>8</sup>Geka binei ma Buka gilumana i baheya i pa,  
 'Hougana gegae hoi yada  
 tu wigawiyena atapuhi i gelagonihi,  
 ma lawa hai guta i welehi.'

<sup>9</sup>(Ma baha geka i pa, 'I gae hoi yada', ma iyowaka? Ega tunawana ita gae ma tamogi i hopu mai hoi hipuli po i hopu hipuli u hine dumana.)

<sup>10</sup>Ma lawana i hopuhopu mai tauna gasi i gae hoi yada po i gelagona duma po tupo atapuhi uyahihi e memae ma e tanitaniwaga. <sup>11</sup>Ma a luguta galenana geka pite: lawa gehouhi tu wituwetuwega ma gehouhi tu bahapiko, ma gehouhi tuwega dewadewana tu bahena ma gehouhi tu galena itete, ma gehouhi tu wiututululouga. <sup>12</sup>Ma Keliso a luguta ipa tauta a lawa ina wononogogeta a bagibagi binei, po tauta hinina kadidili ta waya, <sup>13</sup>a sigana ta witumagana gogona po Yaubada Natuna ta galena tuhagaya po uyahinei dewa dewadewahi nugonugota hina lihogohi po mei Keliso a dewa dewadewana po hogohogona.

<sup>14</sup>Uyahinei tu nowanowa hai dewa apo ta nehalehi babana lolowa wiatatiyana tapuhi po tapuhi hi laihagahagawilita mei togowa guletutu e yoyogehi ma ata nugotuhu hi tapitapiya babana tu wiatatiyana koyakoyama gehouhi hai kamna dagihana uyahinei ta wootagotagohi.

<sup>15</sup>Ma tamogi luhogalagei ta bahabaha dumalu po ata dewa atapuhi hina iwou meme po mei Keliso tu wiununugeta e weluweluwinita. <sup>16</sup>Babana tauta Keliso hinina ma guta tapuna po tapuna i weleweleta ipa ta popo emotehi po ta hagu hagu meta luhogalagei ma ta kadikadidili.

### Dewa odubona ma dewa wouna

<sup>17</sup>Guyau gowanei gasi geka a iututu lulougo uyahimi ipa uputa dewana ona wohouni, babana hai nugotuhu dewa yabayababa uyahihi.

<sup>18</sup>Hai hanapu hi wigahugahu po Yaubada a luyagohana uyahihi ega ita

memae ma he inugoneina babana tanigahi hi pota. <sup>19</sup>Dewa dewadewana kamnana amaka hi winugoguluwi yaka hi palihalena mehi matamaga dewana uyahina po luhogalahi ipa iyeta emosi po emosi dewa gobugobuhi hina wootagohi.

<sup>20</sup>Ma taumi Keliso a dewa yeuyeuna amaka o hanapugeya, <sup>21</sup>babana lolowa tahaya dumana o noonoli ma Yesu binei hi iatatiyemi. <sup>22</sup>Uyahinei omi kamna odubohi naka luhogala apapoehi o dewadewahi ma hi apapoenimi amaka o wihinigigiyehi. <sup>23</sup>Ma omi winugonugotuhu u nugonugomi hina wiwou meme. <sup>24</sup>Yaubada a kamna wouna ona luiya babana kamna dumadumaluna po waiwoiyawana i wawali mei tauna.

<sup>25</sup>Uyahinei koyama ona wohounihi ma atapumi ona ibaabani dumalu emosi po emosi uyahina, babana tauta ataputa Keliso hinina. <sup>26</sup>Hougana ona lauuyogigai yaka ega ina lalata ma ega ona lidaoya po kabudala ina yoliyoli, <sup>27</sup>babana apo Tomodulele a gaogao ona weleya. <sup>28</sup>Tu danedanene hina wohouna ma bagibagi dewadewahi nimahiyei hina dewahi po tu dayadayabu hagu hina welehi.

<sup>29</sup>Ega baha apapoehi ona ibaabaniyehi ma baha dewadewahi ona bahebahehi. Uyahinei apo tu lutanigana ona haguhi po hina kadidili ma Yaubada a lunugotootogo hina tuhagaya. <sup>30</sup>Yaubada Alugona Woiyawa ega ona inugodubuya babana Yaubada i gimagimaleta ata wekiwekilana naka tauna. <sup>31</sup>Ma geke apapoehi ona wihinigigiyehi: baha wigola, uyogigai, widiboga, kawaiapapoe po wigawigawiya. <sup>32</sup>Ma tamogi ona hagu hagu memi po nugohegoyagei omi lawa hai apapoe ona paligigilihi emosi po emosi uyahimi naka pite Yaubada omi apapoe Keliso uyahinei amaka i paligigilihi.

**5** <sup>1</sup>Yaubada a luhogalagei i kawainatunemi yaka ona witutupoganeya. <sup>2</sup>Luhogala maena ona wootagoya mei Keliso i lauhogaleta pite po i palihalena meya po i witalaguyabena meya Yaubada uyahina po i hilahilage ubeita a ombenena dewadewana.

<sup>3</sup>Taumi Yaubada a lawa waiwoiyawami uyahinei matamaga po dewa apapoeihi po omboho ona nehalehi ma ega ubeihi ona ibaabani. <sup>4</sup>Ega dewa gobugobuhi ona deedehi po baha yabayababa ega ona ibaabaniyehi po dewa apapoehi ega ona itutupoganeya naka ega hita linanami tamogi omi bahagei Yaubada ona maamali. <sup>5</sup>Geka bahana naka baha dumana, tu apapoe apega hina lui Yaubada ma Keliso hai ani taniwaga uyahina. Geka tauhi tu matamaga po tu dewaapapoe po tu'mboho. Gapola luhogalana anona, ita witumagana ta huhouni gapola uyahina ma ega Yaubada uyahina.

<sup>6</sup>Geka dewahi ubeihi Yaubada apo a luuyogigai ina wogeleteya tu wiponahahalena uyahihi, uyahinei ega iyai baha yabayababagei ina koyakoyamemi, <sup>7</sup>po tu wiponahahalena ega mitehi ona itulatulana.

<sup>8</sup>Taumi lolowa uguwa uyahinei amaka o damanai Guyau a yayata uyahina, yaka yayata dewanei ona wobagibagi. <sup>9</sup>Yayata dewana anona

naka dewa dewadewahi po dumadumaluhi po moinahi. <sup>10</sup>Yaka ona laudadana Guyau awai i kaokaohehi ona hanapugehi po ona dewahi, <sup>11</sup>po uguwa dewa yabayababana ona lowo haleya ma apapoena ona paligeleteya. <sup>12</sup>Baha dumana dewa gowagowadahi ubeihi ta ibaabani naka ani wihinimaya. <sup>13</sup>Ma apo yayata tu dewaapapoehi ina wogeletehi. <sup>14</sup>Babana yayata ginouli gobugobuhi apo ina lugeletehi po anohi ta hanapugehi. Geka binei ma ta ibaabani ta pa,

‘Tam tu eneno,

hilagei una towolo

po Keliso yayatana ina yaayahim.’

<sup>15</sup>Uyahinei omi mae ona galena itete imahiyehi po ega ona inugoneina ma tamogi ona hanapu duma, <sup>16</sup>po ega omi gaogao ona hahaleya babana geka hougana houga apapoe dumana. <sup>17</sup>Uyahinei ega ona buubuwa ma Yaubada a nugotuhu u nugonugomi ona gagalena imahiyeya. <sup>18</sup>Ega goila kadikadidilina ona umumaya po ona wobadebade, naka ani welupowa ma tamogi Alugo Waiwoiyawana nugonugomi ina lihogohi ma ina laikaohami. <sup>19</sup>Lougo tapalolo omi lawa mitehi ona lawilawihi, Sam lougona po lougo gehouhi nugonugomiyei ona ilulougo Guyau uyahina, <sup>20</sup>ma houga atapuna ginouli magomagouhi ubeihi ona imaamala Yaubada Amata uyahina ma ata Guyau Yesu Keliso gowanei.

<sup>21</sup>Omi wiyateyate Keliso uyahina naka pite gasi omi lawa ona iyateyatehi.

### Tawine lugagayona

<sup>22</sup>Taumi wiwine tawitawineni agagomi hai baha ona wiyateyatehi po naka pite gasi omi wiyateyate Guyau uyahina. <sup>23</sup>Babana wawine agona olotona tu wiununugena naka pite Keliso a bolu tauta tauna ununuta po Tu halota. <sup>24</sup>Uyahinei tauta Keliso a bolu po ta wootagoya naka pite gasi wiwine agagohi hai nugotuhu hina wootagohi.

<sup>25</sup>Ololoto tawitawinemi agagomi ona lauhogalehi po mei Keliso a bolu i lauhogaleta pite yaka i palihalena meya po ubeita i hilage, <sup>26</sup>ipa ina wiwoiyaweta mei bapatiso hougana ita apapoe i hamaga halehi a baha uyahinei po i liyeuyeuta. <sup>27</sup>Yaka tauta apo ina galena tuhagata a bolu namanamalita, ega kikina gobu bo apapoe gehouna uyahita ina memae ipa ta wiwoiyawa po ta haki wahaga. <sup>28</sup>Naka pitenana loloto agagomi ona luhogalehi po mei taumi hinimi o lauhogalehi pite. Babana gegeka, apo iyai agona ina luhogaleya yaka tauna gasi i luhogalena meya. <sup>29</sup>Matababana ega emoemotana po lawa gehouna hinina ina wihinigigiyeya ma tamogi hinina e gagalena iteteya po a hagu e weleweleya naka pite gasi Keliso a bolu e gagalena iteteta, <sup>30</sup>babana tauta hinina gutagutana. <sup>31</sup>Yaubada a Buka i bahebaheya i pa, ‘Lawa hinana ma amana ina nehalehi po agona ina lawagi po mitehi hina wihiniemosi’,

<sup>32</sup>Geka bahana naka paliluwaluwa gowagowadana ma anona Keliso a bolu tauta mitehi ta wihiniemosi. <sup>33</sup>Yaka taumi ololoto tawitawinemi agagomi ona luhogalehi po mei o lauhogalena memi pite ma wiwine tawitawinemi agagomi ona wiyateyatehi.

### Logaloga hai ututu

**6** <sup>1</sup>Logaloga amamami po hinahinami hai baha ona iponawogogehi Guyau u matana, yaka apo omi dewa hina dewadewa. <sup>2</sup>Yaubada a lugagaya gehouna i bahebaheya i pa, 'Amamami po hinahinami ona iyateyatehi'. Geka lugagayo tahatahayana i paliwitumaganeya tu wiponawogo ubeihi, <sup>3</sup>i pa, 'Apo ona iyateyate yaka hoi hipuli ani kaoha ona tuhagaya po omi mae hina dao'.

<sup>4</sup>Ama taumi natunatumi ega ona laidagudaguhi meka po apo hina lauyogigai ma tamogi ata Guyau a taniwaga po a wiatatiyana ona wiututu lulougogehi.

### Babada ma tu bagibagi hai lugagayo

<sup>5</sup>Taumi tu bagibagi omi babada hoi hipuli hai baha anai matoutami ona iyateyatehi ma nugonugomiyei ona wileta kadidili po ona iponawogogehi yaka naka mei Keliso o iponawogogeya. <sup>6</sup>Om bagibagi uyahina ega ipa omi babada hina gagalemi ma ona iwalewalegama. Ma Yaubada a nugotuhu nugonugomiyei ona wotagoya po Keliso gowanei ona wobagibagi imahi. <sup>7</sup>Omi babada uyahihi ona nugohalena memi naka mei Guyau uyahina o itubagibagi ma ega lawa hota. <sup>8</sup>Babana amaka o hanapugeya taumi babada po tu bagibagi atapumi omi bagibagi mihahi Guyau uyahinei apo ona tuhaga gogonehi. <sup>9</sup>Taumi babada omi dewa hina dewadewa tu bagibagi uyahihi po ega ona palipaliyehi ma ipa ona hanapuya taumi po tauhi omi Bada hoi yada e memae ma e tanitaniwagena emotemi.

### Yaubada a gawiya gapolana

<sup>10</sup>Geka u baha a siga, Guyau a kadidiligei po a wipoyagei ona kadidili. <sup>11</sup>Ma Yaubada a gawiya gapolahi atapuhi ona luinihi po hougana Tomodulele ina koyakoyamemi ega ona tapitapiya. <sup>12</sup>Babana ata wigawigawiya ega lawa laugelegeletanahi uyahihi ma tamogi ata wigawigawiya lawa laugowagowadahi uyahihi. Naka tauhi Tomodulele a tu bagibagi waipoyahi po kadikadidilihi po manimaninihi po gasi alugo apapoehi, tauhi hai dewagei hipuli he tanitaniwageya ma he laiuguwi. <sup>13</sup>Geka binei Yaubada a gawiya gapolana atapuna ona wogomomohihi po ega ona tapitapiya ma hougana apapoe e nenei uyahina a wipoyagei ona towotowolo ma a sigana ona towolo kadidili. <sup>14</sup>Uyahinei ona towotowolo po baha dumana dagilolona ona widagilologeya ma yapami



dewa dumadumalunei ona luguduguduya. <sup>15</sup>Ma omi ae humahuma nugodumola, tuwega dewadewana uyahinei aemi ona humahi. <sup>16</sup>Ma omi lagna witumagana, apo uyahinei ona lugaagala memi po Tomodulele a higeyala alalatana ina guduhi. <sup>17</sup>Ununumi lugaagalana luyagohana wouna ma Alugo Woiyawa a gawiya kwasikwasina ona waya naka Yaubada a baha. <sup>18</sup>Houga magomagouna Alugo Woiyawa a wipoyagei ona laupali Yaubada uyahina po omi luhogala atapuhi ona palipaliweleya. Geka binei ona galena itete memi po on'omtaibagibagi ma ona laupali tu wiwoiyawa atapuhi ubeihi.

<sup>19</sup>Ma tau biugei ona laupali po a nugomotu ma tuwega dewadewana hanapu gowagowadana a bahena geleteya. <sup>20</sup>Tuwega geka winoyanoyana binei ma hi houna luiyeu hoi numa panipani, uyahinei ona laupali Yaubada uyahina po tuwega geka a bahena geleteya anai nugomotuwe, babana geka pitenana i linanata.

#### **Baha anani kokoe**

<sup>21-22</sup>Titikasi tulata dewadewana tauna Guyau a tu bagibagi dumadumaluna yaka naka a himiliyahi apo tuwegau atapuna ina dedeya uyahimi po ona nonoli u mae po u bagibagi ubeihi. Ma apo ina wikadidilimi po nugonugomi hina kaoha.

<sup>23</sup>Walewalehiu, a luhogaleya ipa Yaubada Amata ma ata Guyau Yesu Keliso hai nugodumola ma hai luhogala anai witumaganahi hina welemi. <sup>24</sup>Ma iyawoi nawa ata Guyau Yesu Keliso he lauhogalena wahagi hai lunugoototoo ina melabenihi.